

Nunat avannarliit siunnersuisoqatigiiffia Kalaallit Nunaata qanoq iluaqutigerulersinnaaneraa pillugu apeqquteqaat aallaavigalugu oqallittoqarnissaanik siunnersuut.

(Inatsisartunut ilaasortaq Mariane Paviasen, Inuit Ataqatigiit)

Akissuteqaat

(Naalagaaffinngornissamut Nunanullu Allanut Naalackersuisoq)

Nunat avannarliit siunnersuisoqatigiiffiata nunatta qanoq iluaqutigerulersinnaaneraa pillugu apeqquteqaat aallaavigalugu oqallinnissamik Mariane Paviasen, Inuit Ataqatigiinneersup siunnersuuteqarneranut Naalackersuisut qujapput.

Nunanut avannarlernut tunngatillugu naalackersuinikkut Naalackersuisut ingerlataat nunanut allanut tunngasutigut naalackersuinikkut ataatsimut ingerlatat ilagaat. Tamannalu Nunani Avannarlerni Ministerit Siunnersuisoqatigiiffiani sulinermut tunngatinneqarpoq, Inatsisartullu eqqarsaatigalugit sulineq Nunat Avannarliit Siunnersuisoqatigiiffiani sulinermut tunngatinneqarluni.

Helsingforsimi isumaqatigiissut naapertorlugu nunarput, Savalimmiut Ålandilu Nunat Avannarliit Ministeriisa Siunnersuisoqatigiiffiata sulinerini peqataasarput. Tamatuma saniatigut nunani avannarlerni suleqatigiinnermut ministerit 2007-imi *Ålandsdokumentimik* taaneqartumi aalajangerput nunarput, Savalimmiut Ålandillu nunat avannarlerni suleqatigiinneranni pitsaanerusumik inissisimalissasut.

Tamatuma malitsigisaanik nunatta, Savalimmiut Ålandillu aallartitaat Nunani Avannarlerni ministerit siunnersuisoqatigiiffiani, atorfilittat suleqatigiiffiini suleqatigiissitanilu ilaatigut oqaaseqarsinnaatitaalerput, tamatumalu saniatigut Danmarki Finlandilu Nunani Avannarlerni Ministerit Suleqatigiiffiani siulittaasuutitaqartillugit ataatsimiinnerni aqutsisuusinnaalerlutik.

Nunarput Nunat Avannarliit Ministerit Siunnersuisoqatigiiffiata ataatsimiinnerini Nunallu Avannarliit Siunnersuisoqatigiiffiani peqataasinnaallunilu oqaaseqarsinnaatitaavoq, taaseqataasinnaannanili. Tamanna ajornartorsiutaasutut Naalackersuisunit suli isigineqarpoq, pingaartumik suliassa qarfiit nammineq akisussaaffigilersimasavut nunani avannarlerni suliarineqartussanngortillugit. Oqartussaaffinni nunatta oqartussaaffigilersimasaani nunarput taaseqataasinnaatitaaffeqartarpoq.

Taamaattorli suli naalagaaffiit ilaasortaasut kisimik taasisinnaatitaanerannik tunngavilersuivigineqartarpugut. Nunarput Savalimmiullu inatsisitigut inissisimaffik pillugu allakkiamik naalagaaffimmiit pissarsiaqarnikuupput, tassani nunarput Savalimmiullu nunat tamalaat akornanni suleqatigiiffinnut tamakkiisumik ilaasortaasinnaanngitsut tunngavilersorneqarluni. Helsingforsimi isumaqatigiissut aammalu danskit inatsisaat tunngaviusoq malillugit ilaasortaasinnaaneq naalagaaffiunngikkaanni periarfissaanngilaq.

Allakkiaq Naalackersuisut nutsertippaat, piareerpallu Inatsisartuni ataatsimiitsitalianut susassaqtunut agguanneqassaaq.

Taamaattumik nunatta Nunani Avannarlerni Ministerit Siunnersuisoqatigiiffiani peqataanera Naalackersuisut nalilersorlugu aallartinniarpaat. Nunat Avannarliit Ministerit Siunnersuisoqatigiiffiani suliassat pingaarnersiorneqartarnerisa Naalackersuinit nutaamik isummerfigineqarnissaat pisariaqalersimavoq.

Suliassat suliassaqarfiillu Nunat Avannarliit Ministeriisa Siunnersuisoqatigiiffianeersut amerliartorput suliassallu annertusigaluttuinnartut Namminersorlutik Oqartussat allaffeqarfiani sularineqartarnissaminnut inuttassaqartinneqaratillu piffissaqarfigineqanngillat.

Suliassani tiguneqarsimasuni piginnaasaqarfigisanilu nunarput sunniuteqarsinnaannanilu taaseqataasinnaangippat nunatta peqataajuarnissaa nalilersoqqittariaqarpoq.